



## SIARAN MEDIA

Untuk Siaran Segera

### **mySalam Perluas Capaian Menerusi Karnival 3K di Pulau Bum Bum**

*Menghubungkan Informasi Kewangan, Kesihatan dan Kebajikan kepada Komuniti Pulau.*

**3 Julai 2025, Sabah** – mySalam, skim perlindungan takaful nasional untuk komuniti B40 yang diuruskan oleh Great Eastern Takaful Berhad (GETB), telah melakar sejarah melalui penganjuran program jelajah pulau berskala besar pertamanya iaitu Karnival 3K: Kewangan, Kesihatan, Kebajikan, yang berlangsung pada hari ini di Pulau Bum Bum, Semporna, Sabah.

Inisiatif penting ini membawa misi mySalam untuk memperluas perlindungan secara inklusif ke Pulau Bum Bum yang dihuni lebih 30,000 penduduk yang telah sekian lama berdepan dengan cabaran daripada segi infrastruktur, penjagaan kesihatan dan pendidikan kewangan. Karnival ini menzahirkan komitmen mySalam yang membuktikan komuniti boleh dibantu dan dilindungi walaupun berada di lokasi yang jauh.

Karnival yang berlangsung selama seharian ini menyajikan pelbagai aktiviti menarik berteraskan tiga teras utama iaitu kewangan, kesihatan dan kebajikan. Komuniti setempat berpeluang untuk terlibat dalam sesi pendidikan kewangan yang interaktif, mendapatkan khidmat nasihat di lokasi, dan meraikan pelancaran papan tanda baharu SK Balimbang di samping menyertai taklimat kesedaran alam sekitar yang membantu memupuk gaya hidup lebih baik dalam kehidupan seharian mereka.

“Selepas menjejakkan kaki ke beberapa perkampungan Orang Asli dan rumah panjang di Sarawak, penganjuran Karnival 3K mySalam di Pulau Bum Bum amat bermakna buat kami,” kata En. Syuhaib Ithnin, Ketua mySalam, Great Eastern Takaful. “Ini bukan sekadar program capaian biasa, ia adalah satu iltizam. Kami mahu setiap rakyat Malaysia, tanpa mengira perbezaan demografi dan lokasi mengetahui bahawa mereka adalah didengari, disokong dan dilindungi. Matlamat kami bukan sekadar untuk meningkatkan kesedaran, tetapi untuk memberi akses secara langsung dan berterusan kepada perlindungan, ilmu serta peluang. Apa yang kami saksikan di Pulau Bum Bum ini ialah sebuah komuniti yang telah bersedia untuk menerima bantuan serta perubahan positif dan kami berbesar hati untuk berdiri teguh bersama mereka.”

Aspek kesihatan dan kebajikan turut menjadi fokus utama karnival ini. Para pelajar diberikan beg sekolah baharu, 700 keluarga dibantu dengan pemberian Bakul Rezeki yang mengandungi makanan asas, manakala komuniti berpeluang untuk melakukan saringan kesihatan percuma. Semangat muhibah turut diperkukuh melalui acara Sukan Rakyat, pertandingan reka cipta kitar semula, dan program *outreach* khas melalui bot untuk menyalurkan bantuan ke perkampungan atas air berdekatan. Hari yang penuh bermakna ini diakhiri dengan acara Cabutan Rezeki, meninggalkan kenangan indah buat semua yang hadir.

Sejak dilancarkan, mySalam telah membantu lebih 1.7 juta rakyat Malaysia dan menyalurkan wang tuntutan lebih RM1.2 bilion. Sehingga Mei 2025, pendekatan jelajah hibrid yang diterajui mySalam telah mencapai lebih 330 sesi fizikal serta 1,865 sesi TikTok Live dengan 7.47 juta tontonan. Pencapaian ini memperkukuhkan lagi komitmen untuk memastikan tiada yang terpinggir daripada aspek digital dan fizikal.

Kejayaan Karnival 3K mySalam ini tidak akan tercapai tanpa kerjasama erat dengan Jaringan Pendidikan Kewangan (FEN), Persatuan Takaful Malaysia (MTA) dan Pertubuhan Kebajikan Sedulur.

**-TAMAT-**

### **MENGENAI mySalam**

mySalam ialah skim perlindungan takaful PERCUMA yang disediakan oleh kerajaan kepada komuniti B40 di Malaysia. Skim ini adalah di bawah seliaan Kementerian Kewangan Malaysia dengan pembiayaan Tabung Amanah mySalam dan pengurusannya dikendalikan sepenuhnya oleh Great Eastern Takaful Berhad.

Skim Perlindungan Takaful mySalam telah diperkenalkan dengan pengoperasian selama lima tahun, bermula pada tahun 2019 sehingga 2023. Susulan maklum balas positif yang diterima, pihak kerajaan telah bersetuju untuk melanjutkan skim ini sehingga tahun 2025.

### **MENGENAI GREAT EASTERN TAKAFUL BERHAD**

Great Eastern Takaful Berhad adalah syarikat usaha sama antara i Great Capital Holdings Sdn Bhd (i-Great), anak syarikat Great Eastern Holdings Limited dan Koperasi Angkatan Tentera (M) Berhad. Sejak ditubuhkan pada tahun 2010, Great Eastern Takaful komited dalam menyediakan produk perlindungan takaful keluarga komprehensif yang memberi perlindungan kesihatan dan kewangan patuh syariah dalam usahanya untuk merapatkan jurang perlindungan di kalangan rakyat Malaysia, termasuk kumpulan berpendapatan rendah (B40). Menzahirkan pendekatan Takaful untuk Semua, operasi perniagaan GETB disokong oleh pelbagai saluran pengedaran, rakan perniagaan korporat dan perbankan untuk terus mengukuhkan kedudukannya dalam industri dan memenuhi keperluan perlindungan para pelanggan.

Melangkaui operasi perniagaan, Great Eastern Takaful juga giat menjalankan pelbagai inisiatif tanggungjawab sosial yang memfokuskan pendidikan (GET-Pintar), pembangunan komuniti (GET-Care) dan kelestarian alam sekitar (GET-Green) demi membantu masyarakat memperoleh kualiti hidup yang lebih baik.

Aspirasi Great Eastern Takaful untuk mencapai kejayaan bersama rakyat Malaysia adalah terbukti melalui pelbagai anugerah dan pengiktirafan tempatan dan antarabangsa. Antara pengiktirafan terkini adalah anugerah “Pengendali Takaful Terbaik Malaysia 2022” oleh Global Business Outlook Awards dan pada tahun 2023, Great Eastern Takaful diiktiraf sebagai “Most Valuable Brand – Takaful Solutions” oleh The BrandLaureate BestBrands Awards, “Penyedia Penyelesaian Takaful Terbaik” oleh Global Islamic Finance Awards (GIFA) serta pelbagai anugerah Takaful Star Awards oleh Persatuan Takaful Malaysia. Tahun 2024 menyaksikan Great Eastern Takaful diperakui sebagai “Majikan Terbaik” oleh Anugerah Majikan Terbaik Kincentric, dianugerahkan sebagai “Penyedia Penyelesaian Takaful Terbaik” oleh Global Islamic Finance Awards (GIFA), diiktiraf dengan “Anugerah Inisiatif – Upcycling” oleh ESGBusiness Awards di samping menerima beberapa anugerah lain daripada HR Excellence Awards 2024. Untuk maklumat lanjut, sila layari [www.greateastertakaful.com](http://www.greateastertakaful.com). Great Eastern Takaful juga merupakan ahli PIDM.

Pihak Kerajaan juga telah melantik Great Eastern Takaful sebagai pengurus skim mySalam, yang merupakan skim perlindungan kesihatan nasional yang dikawalselia oleh Bank Negara Malaysia.

**Untuk keterangan lanjut, sila hubungi:**

Mastura Abd Rahim

Penolong Naib Presiden – Penjenamaan & Komunikasi Korporat

Great Eastern Takaful Berhad

Tel: +6016 - 209 234

E-mel: [MasturaAbdRahim@greateastertakaful.com](mailto:MasturaAbdRahim@greateastertakaful.com)